

40^e Hoegste Oondersjeiing in 't jaor 2023

Ein vaan de hoegtepunte vaan 't jaor is veur vöole vaan Lummel en Nazareth en ouch veur us, de touwkinning vaan de Hoegste Oondersjeiing, in dit geval vaan 't jaor 2023.

De Hoegste Oondersjeiing weurt jaorleks touwgekind aon 'nne persoan, 'nne gróp, vereineging of stiechting die zich zoonder de tesse te völle of mèt de boors veuroet te loupe op vrijwèllege basis inzet veur de gemeinsjap vaan Lummel en/of Nazareth.

Allewel en oondaanks tot 't eders kier lestiger weurt door 't opdoeke vaan miejer vereineginge, door 't sterk verandere vaan de indentiteit vaan us 2 parochies, 't leie tekort bij vereineginge of door de polletiek en 't gekoze woeningbeleid, of 't wegvallende vaan veuraonstaonde lui die zich inzette veur de buurt, höbbe veur dit jaor toch weer get hiel sjoens gevoude.

De kemissie, die dit jaor de kääs heet bepaold, bestoond oet aajd prins, nog altied vaan veur de corona-tied, Prins Philip d'n Ierste vaan 2020, 'nne beëdigde Braniemeeker, Frans Ritz, en 'n beëdig lid vaan de Braniemeekerkes, in dit geval Jäög-President Jo Boumans en de winnaar vaan veureg jaor, d'n hier Chris Meys, veurzitter vaan Buurtnetwerk Lummel.

Op de boetegewoen geheim vergadering, boe in veer 'ne winnaar móste oetzeuke, ginge weer hiel get gegadegde euver de taofel. Veer móste jammers 'ne gooje opvolger zeuke veur de winnaar vaan veureg jaor; De veurzitter vaan BuurtNetwerk Lummel, d'n hier Chris Meys.

Meh gelökkeg zien d'r nog altied lui die 't hart op de gooj plaots höbbe en ziech in wèlle zette veur de gemeinsjap zoonder dao zelf beter vaan te mote weure.

Heerlijk toch, este nog altied oonderein kins ensele, euver de kandidaote die 't zouwe kinne weure. Veer höbbe in de historie, vaanaof 1984 tot en mèt veureg jaor, noe al 39 lui of vereininge in 't zönneke kinne zette, die allerlei zakes hielemaol vrijwèlleg en op de achtergrond doen, veur vereineginge of veur de buurt, veur iemes zörge of es gróp get sjoens doen veur de gemeinsjap Lummel/Nazareth.

Leef luij, de 40e Hoegste Oondersjeiing vaan CV de Braniemeekers in 't jaor 2023 is touwgekint aon:

Mevrouw Juliënne Kars

Veer felicitere Juliënne daan ouch vaan harte mèt dees beneuming.

Vaanzelfsprekend zien de felicitaties ouch veur häöre maan Appie dee ziech ouch al jaore belangeloos inzet veur de buurt. Ouch heer heet in 't jaor 2000 de ier gehad um de Hoegste Oondersjeiing destieds te mage oontvaange.

Veer hope vaan ganse harte tots diech Juliënne, dat sjeike en dèks ouch dankbaar wèrk wijer wèts door te zette en tot d'r nog hiel vööl doele veur Lummel bereik mage weure!!!

Aldus beslote, Lummel, zondag 29 jannewarie 2023

Naomes de kemmissie Hoegste Oondersjeiing en Prezidium CV de Braniemeekers

Prizzident Roy Beaumont & Opper-Moeljaan Marcel Coolen

Korte impressie vaan de winnaar “Juliënne Kars”

Nao oetveureg euverlék is de kemissie vaan de Hoegste Oondersjeing tot 't volgende besluit gekoume:

De persoen dee veer oetgekoze höbbe weurt es volleg besjreve:

'ne riechtege doezendpoet, mèt 'n drök gezin en de nudege kleinkinder boe zie hiel gere op lètte deit, noe wie al häör eige kinder de deur oet zien.

Alle ze leve is Juliënne oondaanks häör gezin en häör baon in 't hospitaol, vrijwilleg bezeg gewees binne de Lummelse gemeinsjap.

Oppe basissjaol heet ze mètgewèrk aon- en in de Bieb, boe de kinder beukskes kóste liene en leze. Juliënne waor ouch de opriechter vaan de kinderhook.

Zie heet jaore mètgewèrk aon 't mini-preuvenemint dat in Lummel georganiseerd woort.

Es ervare verpleegkundege kós ederein ouch altied 'n beroop op häör doen es gedilpomeerd EHBO'er. Dao höbbe de Braniemeekers dèks dankbaar gebruik vaan gemaak en zoe ouch versjeie aander vereininge die 'n verpliechting hadde um bij activiteite 'ne diplomeerde EHBO'er aonwezeg te höbbe. Noets leet Juliënne de lui in de kaw stoon!

De lèste jaore heet ze same mèt häöre maan Appie 'n nui bezegheid gevoonde nao tot zie zelf neet mie hove te wèrke. Oppe kinderboerderij in Lummel is d'r 'n oetgiftepunt vaan veujjel ingeriech. Neet direk de in de volksmoond bekinde voedselbaank, meh 'n plaots boe lui die 't good kinne gebruke langs kinne koume en dao etenswaor en aander produkte kinne aofhole. Sjiek tot zoe get bij us in de buurt geregeld is en dus meugelek is. Juliënne is hij same mèt de lui vaan de kinderboerderij hiel drök mèt. Zoe ouch mèt de inzamelactie vaan levensmiddele en aander produkte veur de keerspakètte die op 'n zier diskrete meneer aon de lui gegeve weure die 't ech good kinne gebruke en zoe ouch 'ne zaolege keersmes kinne mètmake. De aofgeloupe twie jaor zien zeker 60 gezinne blij gemaak door dees actie.

Tot zie 't hart ech op de riechtege plaots heet zitte is dus wel dudelek.

Veer höbbe 't dus euver Juliënne Kars.

Zie is gebore in Belsj in Laonake op 8 mei 1958 en al hiel vööl jaore same mèt häöre maan Appie woenend in Lummel aon de Emmausstraot 12A. Ze höbbe 3 kinder, Inge, Frank en Anne, en ouch 3 kleinkinder.

Mèt vööl respect wèlle veer laote blieke gruits op häör zien en daomèt, proclamere, annoncere, verordenere en declamere veer tot 't us kin apprècière en tot veer häör decorere mèt ... De Hoegste Oondersjeing 2023 vaan CV de Braniemeekers vaan Lummel en Nazareth.

Juliënne vaan harte Perficia!